

Primljeno: 29.03.2002			
Org. jed.	Broj	Prilog	Vrijednost
01/5	011-298/02		10x H


BOSNA I HERCEGOVINA
PARLAMENTARNA SKUPŠTINA
ZASTUPNIČKI DOM

Komisija za ljudska prava, imigraciju, izbjeglice i azil

Broj: 01/5-011-298/02.

Sarajevo, 21.03. 2002.

Z A P I S N I K

Sa 15. sjednice Komisije za ljudska prava, imigraciju, izbjeglice i azil održane 26. 03.2002. godine

Petnaestoj sjednici Komisije prisustvovali su Brka Osman, Jovanović Miloš, Grabovac Miro, Osmanović Bahrija, Kamberović Violeta, Cuplov Mustafa i Filipović Omer. Odsustvovali su Stokić Dušan i Majdandžić Franjo. Sjednici su prisustvovali i pozvani predstavnici sveučilišta u Bosni i Hercegovini u svojstvu članova proširenog Organizacionog odbora Okruglog stola «Jačanje parlamentarnog angažiranja u zaštiti ljudskih prava u Bosni i Hercegovini» Doc. Dr. Gene Trnavci ispred Univerziteta u Bihaću i Đerić Rajka ispred Univerziteta u Srpskom Sarajevu.

Za sjednicu je predložen slijedeći

DNEVNI RED:

1. Konsultacije za pripremu organiziranja Okruglog stola «Jačanje parlamentarnog angažovanja u zaštiti ljudskih prava u Bosni i Hercegovini» kojeg organizira ova Komisija.

2. Tekuća pitanja.

Pojašnjavajući problematiku koja će se naći pod tačkom 2. ovog dnevnog reda, predsjedatelj Brka Osman je ponudio da se raspravlja o slijedeće dvije podtočke:

a) Razmatranje «Prosvjednog pisma UDVDR HVO H-B na nezakonitu raspodjelu građevinskog materijala» i poduzimanje mjera u vezi ove problematike.

b) Aktivnost grupa Komisije na dogovorenom obilasku područja Bosne i Hercegovine s osvrtom na stanje u Drvaru, inicirano od strane člana Komisije gosp. Majdandžić Franje

Ovakav dnevni red je jednoglasno usvojen.

Ad – 1

U uvodnom izlaganju za prvu točku dnevnog reda, predsjedatelj Brka Osman je ukazao na osnovne aktivnosti koje su se do sada odvijale po pitanu organizacije Okruglog stola. Ujedno je predstavio Komisiji novog tajnika Komisije, a osvrnuo se na rad dosadašnjeg tajnika g-đe Stanišić Rajke ističući da su svi članovi Komisije, a posebno on kao predsjedatelj bili veoma zadovoljni njenim radom, pa je pohvaljuje najiskrenije i zahvaljuje na dosadašnjem radu. Ovu konstataciju predsjedatelja Komisija je jednoglasno podržala. Komisija je upoznata sa aktivnošću OSCE-a koji je pristao da finansira aktivnost, ali koji je temi dao drugačiji naslov

«Jačanje parlamentarnog angažiranja u zaštiti ljudskih prava u Bosni i Hercegovini» te predvidio da se ova tema obradi u tri podteme i to:

- Razvoj institucija za ljudska prava u post-konfliktnim društvima,
- Uloga parlamenta u promoviranju i nadzoru poštovanja europskih standarda o ljudskim pravima.
- Jačanje veza između Parlamenta domaćih institucija za ljudska prava (ombudsman, komisije za ljudska prava itd.): ukoga parlamentarnih komisija u analizi izvještaja domaćih institucija za ljudska prava, objavljivanje preporuka i provođenje nadzora.

Predsjedatelj je izrazio mišljenje da Komisija treba točno utvrditi ko su učesnici Okruglog stola, te imenom i prezimenom predložio jedan broj domaćih i stranih učesnika. Od stranih učesnika istakao je da bi Okrugli sto imao veći dignitet ako bi mu prisustvovali: Šerif Basiuni, Holbruk, Badinter i Mazovjecki. Isto tako, predložio je da se u Organizacioni odbor kooptiraju predstavnici medija (tiska i TV), konkretno ističući imena Džanića Asafa iz «Jutarnjih novina» i Mirze Buljubašića iz TV OBN.

Iza uvodnog izlaganja predsjedatelja uslijedila je duža diskusija u kojoj su učestvovali svi prisutni članovi Komisije, kao i prisutni predstavnici sveučilišta. Miro Grabovac je predložio jače angažiranje sveučilišta Bosne i Hercegovine u održavanju Okruglog stola. Ujedno je tražio da se odrede kriteriji i principi po kojima će se odrediti učesnici. U tom smislu, predlaže da sveučilišta i odrede učesnike. G-đa Osmanović je podržala jače učešće sveučilišta BiH, ali se založila i za određenu samostalnost Komisije i Organizacionog odbora u određivanju učesnika. Predložila je da sveučilišni profesori budu uvodničari, a u raspravi da učestvuju i drugi učesnici. Ona, kao i g-đa Kamberović su se založile za aktivnije učešće žena na ovom Okruglom stolu. G-đa Kamberović je istakla aktivnost OSCE-a u održavanju Okruglog stola, pa je i promjena naziva teme uslijedila s ciljem uvrštavanja Okruglog stola u Program pomoći Parlamentu. G. Cuplov je podržao aktivniji rad sveučilišta, ali je iskazao sumnju u njihovu ekspeditivnost po pitanju određenja tolikog broja učesnika, kvalitet tema i mogućnost da se one pripreme do određenog roka održavanja okruglog stola. G. Jovanović je istakao da i ovaj Organizacioni odbor može predložiti učesnike i stajati iza njihove reputacije, pa bi bilo dobro da pored prijedloga sveučilišta BiH bude i prijedloga Organizacionog odbora. G. Filipović je podržao ovu aktivnost, podržavajući prijedlog OSCE-a za postojanje tri teme o kojima bi se raspravljalo, te predložio i četvrtu temu koju bi Organizacioni odbor sam odredio. U raspravi su učestvovali i delegirani članovi univerziteta u Bihaću i Srpskom Sarajevu, podržavajući aktivnost i zalažući se za aktivniju ulogu sveučilišta u organiziranju Okruglog stola.

Poslije diskusije zaključeno je sljedeće:

- termin dvodnevnog održavanja Okruglog stola je početak lipnja 2002. godine, najvjerojatnije 01. i 02.06.2002. godine.
- Da tajnik Komisije i Okruglog stola napravi prijedlog programa održavanja Okruglog stola sa točno određenom minutažom imajući u vidu početak prvog dana od 09.00 sati i završetak prvog dana u 19.00 a drugog dana u 17.00 sati, te vodeći računa o dužini izlaganja učesnika koja ne bi trebala prelaziti 20 minuta, kao i o dovoljnom broju pauza,
- Da Okrugli stol raspravlja na tri teme predložene od OSCE-a kao i četvrtom koja glasi: «Daytonski sporazum i ljudska prava»,
- Da se uputi novi dopis (urgencija) sveučilištima BiH da delegiraju svoje predstavnike u rad Organizacionog odbora,
- Da se obavijeste strani učesnici: Basiuni, Holbruk, Badinter i Mazovjecki, a ako odbije neko od učesnika i Karl Bilt o približnom terminu održavanja s provjerom o učešću na okruglom stolu.

- Da se razmisli o potencijalnim učesnicima Okruglog stola te na sjednici koja treba biti u iduću srijedu da se utvrdi lista učesnika.

Ad 2 – podtočka 1.

U svezi «Prosvjednog pisma UDVDR HVO H-B na nezakonitu raspodjelu građevinskog materijala» uvodne napomene je dao član Komisije Miro Grabovac. Uvodničar je istakao da u cijelosti stoji iza navedenog prosvjednog pisma te traži da se o ovakvoj aktivnosti državnih i entitetskih organa izjasni i Komisija. Posebno je ukazao na nepravednu raspodjelu koju provode izvršni organi zaduženi za raspodjelu. U raspravi koja je zatim slijedila učestvovalo je nekoliko članova Komisije. G. Cuplov je izrazio čuđenje da može doći do sumnjive raspodjele donacija koje prima država a raspoređuju državni organi, te podržao aktivnost da se provjere navodi protestnog pisma. Predsjedavatelj je u svom obraćanju, ukazao na aktivnost Komisije prije ove sjednice, te pročitao odgovor Ministarstva za ljudska prava i izbjeglice Bosne i Hercegovine na naš upit o ovom problemu. Ujedno je ukazao na postojanje zaključaka Vlade Federacije BiH o ovom pitanju, a na kraju ukazao i na članak iz sredstava informiranja koji je pisao o ovom. U raspravi je učestvovao i tajnik Komisije, koji je ukazivao na pravnu stranu potpisanog Protokola o pomoći stambenom zbrinjavanju, te o važenju određenih zakona HR HB u današnje vrijeme.

Poslije diskusije zaključeno je da se Komisija obrati Ministarstvu za ljudska prava i izbjeglice BiH, Vladi Federacije BiH i Federalnom ministarstvu za pitanje invalida i branitelja Domovinskog rata i da od njih traži informaciju o toku dosadašnje raspodjele donacije, o posjedovanju pravno usvojenih kriterija o dodjeli donacija, koji bi trebali biti doneseni od Ministarstva za ljudska prava i izbjeglice BiH i Federalnog ministarstva, te ako ne postoje kriteriji da se odmah stane sa daljnom raspodjelom donacije dok se ne utvrde kriteriji. Isto tako, traži se od ova dva navedena organa, da o toku implementacije programa pomoći Vlade Republike Hrvatske redovito informiraju do okončanja programa.

Ad 2 – podtačka 2

Predsjedavatelj Brka Osman je prisutne upoznao sa zahtjevom člana Komisije G. Majdandžića da se snimi stanje provođenja imovinskih zakona na području općine Drvar i njihov uticaj na iseljavanje Hrvata s tog područja. Ukazao je okolnost da se njemu obratio g. Majdandžić zahtijevajući da se ova problematika stavi na dnevni red uz prijetnju da će g. Majdandžić u protivnom podnijeti ostavku.

Iznoseći ovu problematiku, predsjedavatelj je predložio da grupa članova Komisije, koja treba obići Krajinu u idućoj sedmici posjeti i Drvar te se o svim bitnim i interesantnim pitanjima temeljito informira, a da rezultate obilaska tog područja, kao i Drvara prezentira Komisiji koja će ovu problematiku hitno staviti na dnevni red. Ovakav zaključak je jednoglasno prihvaćen.

Ovim je završena 15. sjednica Komisije.
Sjednica je završena u 15.40. sati.

TAJNIK KOMISIJE

Dr. Zijad Hasić

PREDSJEDAVAJUĆI KOMISIJE

Osman Brka